

Fobitro Injil Shorif 8 nombor sifara dusra Korintia Forisiti

Fobitro asmani kitabor ou sifara Alla Pakor hukume Hozrot Isa al-Mosir sahabi Hozrot Pauluse (ra:) siṭir aḳare leksoin. Ikan oilo Korint zomator gese tan leḳa dusra sohifa. Onuman ḳora oe, Hozrot Isae behesto toshrif neoar 21 bosor bade ikan leḳa oise.

Korint zomator loge zebla Hozrot Paulusor shomporko bala asil na, ou shomoe tain zomator gese i siṭi lekṣila. Paulusor sahabi fod loia Korint zomator ḳoezon manshe kub birudita ḳorsil. Ou sifarar maze tain itar zuaf disoin.

Hozrot Paulusor leḳa ou sohifar mazdi tanre aro bala ḳori sina zae. Leḳoke tan monor ḳota, Allai kush-ḳobri tobligor befare tan utshaho, duk-mosibotor ḳota, ar foela Isaei zomator maze ṭeḳa-foeshar obabor shomoe eḳe-oinne kila shaijjo ḳorsoin, ita ou sifarar maze lekṣoin. I sifarar maze ullek kora Asiya desh oḳonkur Turoshko deshор bitre, ar Makidonia oḳonkur Gris deshор bitre. Hou shomoe ita shadin desh asil.

Ermaze ase,

- (1) Bumika 1:1-11 *aeat*
- (2) Korint zomator loge Hozrot Paulusor shomporko 1:12-7:16
- (3) Ehudiar Isaei imandar oḳolor lagi dan 8-9 *ruku*

(4) Sahabi hishabe Hozrot Paulusor odikar 10-13 ruku

Bumika (1:1-11)

Salam zanani

¹ Ami Paulus, Alla Pakor morzi mafik Hozrot Isa al-Mosir ekzon sahabi. Korint taunor Isaei zomat ar asta Gris deshor maze Allar zoto pak bonda okol boshot koroin, erar gese ami ar amrar mumin bai Timotie ou sohifakan lekram.

² Amrar gaibi baf Alla Pake ar malik Isa al-Mosie afnara hoqolor ufre rohomot ar shanti nazil koroukka.

Buz deoar malik Alla

³ Amrar malik Isa al-Mosir gaibi baf Alla Pakor tarif ouk. Tainu rohmanur rohim Alla, hokkolor dilor buz deora Alla.

⁴ Hoqol zat duk-mosibotor shomoe tain amrare buz dein, zate tan ges taki buz faia, oinnor duk-mosibotor shomoe amra-o tarare buz ditam fari.

⁵ Al-Mosir lakan amra zela bout duk-mosibot shoijsjo koriar, oula tan usillae bout buz-shantio faiar.

⁶ Amra ze duk-mosibot shoijsjo kori, ita to tumrar monor shantona ar nazator lagiu kori. Tumrare buz deoar nioteu Allae amrare buz dein. Tumra zebra amrar lakan duk-mosiboto forbae, ou shomoe amrar deoa buz mafik tumrar koshtore shoijsjo korte shaijsjo korbo.

⁷ Tumrar ufre amrar mozbut ekin ase, tumra zela amrar duk-mosiboto shorik aso, oula Allar deoa buz-shantonar mazeo shorik aso.

⁸ Turoshkor Asiya desho amra ze mosiboto forslam, ota tumrare zanaitam sai. Hino takte

amrar ufre ze azab aisil, ou azab ola marattox asil, erlagi amra zanor maea saři dislam.

⁹ Mono qorslam, amra nichchit mara zaimu. Te amrar i halot oisil, zate amra nizor ufre borosha na qoria, ze Allae murdare zinda qori tuloin, ou Allar ufre borosha qori.

¹⁰ Eķ bezuita moutor at taki tain amrare basaisoin, ar oķono basaira. Amra tan ufre borosha qortam fari, tain hameshau amrare olaķan basaiba.

¹¹ Tumrao dua-munazat qoria amrare shaijjo qorrae, erlagi bout zonor duar qatire amra ze rohom faisil, otar fol deķia bout Allar shukria adae qorba.

Korint zomator loge Hozrot Paulusor shomporko (1:12-7:16)

Hozrot Paulusor soforor deri

¹² Amra zeta loia gourob qoriar, amrar bibeķeo ola qoe, Allar deoa fobitro ar shorol mon loia hoķol manshor maze zindegil qataisi, qas qori tumrar mazeu qataisi. I zindegil amra duniabi aķol-hekmote nae, qali Allar rohomotor bole qataisi.

¹³ Amra to tumrar gese lukai-safai kunuta leķiar na, tumra ze leķa forrae ar buzrae, qali ou befareu leķiar. Ar asha qoriar, tumra hameshau ola buzat roibae.

¹⁴ Ashole amrar befare tumra tuŗa kisu zaniau, amrare loia zela boŗai qorrae, malik Isae toshrif anar shomoe tumrare loia amra-o ola boŗai qormu.

¹⁵ Ar ou qotar ufre borosha qoria ami kub kiali oislam, ami aoa-zaoar foto duiobar tumrar

gese zaimu, gele tumra duiobaru rohom-niamot faibae.

¹⁶ Ami mono kōrslam, Makidoniat zaoar fote tumrar loge deka kōrmu ar hon taki hirbar tumrar gese aimu, zate Ehudia zilat zaoar k̄alo tumra amare aguaia deo.

¹⁷ Oile ami na aoae tumra mono kōrrae ni, ami ita dōng kōrslam? Zogotor manshe zela eḱbar k̄oe “Oe, oe” aroḱbar k̄oe “Na, na”, amio ola ni?

¹⁸ Alla Pak to hok ar kaṭi, ikan zela hasa, oula eoḱano hasa, tumrar gese amrar zoban eḱbar “Oe” ar aroḱbar “Na” oe na.

¹⁹ Ami, Silas, ar bai Timotie tumrar gese zar k̄ota toblig korsi, hou Isa al-Mosiu oila Allar ḱas maear zon Ibnulla, tain eḱbar “Oe” ar eḱbar “Na” nae, tain to hoḱol shomoeu “Oe.”

²⁰ Alla Pakor hoḱol oadau to al-Mosir mazdi fura oe. Erlagi munazator shomoe Allar gourob- bor lagi al-Mosir namor usillae amra “Amin” mani “Oe” k̄oi.

²¹ Ar al-Mosir lagi amrare ar tumrare zein mozbut k̄ori ṭikai rak̄soin, tan nam Alla. Tainu amrare k̄elafōti disoin.

²² Tan nizor don hishabe amrare sil-sappoḱ maria rak̄soin, ar tain zeta amrare dibar oada k̄orsoin, itar foela kisti hishabe amrar dilor maze Allai Pak Ruh dan k̄orsoin.

²³ Ami Allare shakki rakia amar zindegir ḱosom kaia k̄oiram, tumrar bae doya-maea taḱae tumrare basanir kiale ami Korint ṭauno zaoa bond rak̄si.

²⁴ Amra nizore tumrar imanor malik mono k̄orram na, borong tumrare kushi-bashie rak̄ar

lagi tumrar loge roia kam korram. Karon tumra imane mozbut aso.

2

¹ Erlagi mone mone tik korlam, tumrar mono duk deoar lagi ami ar tumrar gese zaitam nae.

² Karon ami tumrare duk dile amare kushi korbo ke? Ar ami zarare duk dimu, ou tumra sara amare kushi korar ar to keu nai.

³ Amar ila lekar karon oilo, ami zebila zaimu, ou shomoe zera amare kushi korar kota, tarar ges taki zanu kunu duk na fai. Tumrar ufre amar i bishash ase, ami zetata kushi oimu, tumrao itat kushi oibae.

⁴ Amar mono boru duk loa, sokur fani falaia age tumrar gese lekhlam. Ashole ami tumrare duk deoar lagi leksi na, borong tumrar lagi amar ze koto mohobbot, okan zanarir lagi leksi.

Oforadire maf kora

⁵ Amare zudi keu duk dia take, te he kali amare nae, tura oileo tumra hokolreu duk dise.

⁶ Tumra beshir bag zone milia tare ze shaza diso, otou tar lagi zotesto.

⁷ Okon tumra tare maf kori dilao, tare buz deo, zate beshi duke he kator na oe.

⁸ Erlagi kas kori tumrare koiram, tumra zen tare maea koro, ita forman kori dekao.

⁹ Ami forikka kori dektam saislam, tumra hokol befare baiddo aso ki na, erlagiu ami tumrar gese leksi.

¹⁰ Tumra zudi kunu befare keurore maf kori dilao, te amio tare maf kori dei. Ar hasau zudi

ami kunta maf qoria taki, te al-Mosir samne tumrar lagiu qoriar,

¹¹ zate shoetane amrare duka dito na fare. Tar ku-motlobor qota to amrar ozana nae.

al-Mosire sinau to geranor laqan

¹² Ami Toruas tauno al-Mosir befare kush-qobri toblig korat gia deklam, hono kam qorar lagi malike amare ekta shuzug kori disoin.

¹³ Oile amar imandar bai Titasre hono na faoae amar mono kub oshanti asil. Erlagi Toruas taunor manshor ges taki bidae loia Makidoniat gelangi.

¹⁴ Oile amra Allar shukria zanai, tain amrare hamesha al-Mosir bizoeor moha furtir misilor loge salaira. Al-Mosire sina to ek geranor laqan. Allae tan zoe-zatrae ou geran amrar mazdi hoqol zagat sitrai dein.

¹⁵ Zera nazat hasil qorra ar zera binash oira, ou duio dolor lagi amra oilam al-Mosir ek geran, ou geranre al-Mosie Allar dorbaro kurbanir laqan shofia dira.

¹⁶ Zera binash oizar, tarar gese amrar geran oilo morar gondo, zar fol oilo nichchit moron. Ar zera nazat hasil qorra, tarar gese amra oilam zindegir geran, er fol oilo aqerator zindegi. I oto bozo nek kam qorar lak kun zon?

¹⁷ Nizor labor lagi zela bout zone Allar kalam loia bebsha qore, amra to itar laqan nae. Amra borong Allar fatail zon hishabe shorol mone al-Mosir name Allare azir-nazir rakia toblig koriar.

3

Allar loge milonor noea ek usillar qadim

¹ Tumra kita mono ƙoro, amra ita ƙoia hirbar amrar nizor shunam gaoat lagsi ni? Kunu kunu manshor zela oinnor ges taki sonod neoa lage, amra-o olaƙan tumrar gese ba tumra taki sonod faoa lagbo ni? Na, muƙeu na.

² Tumrar nam to amrar dilor maze leƙa ase, tumrau oilae amrar sonod. Ar ou sonodor ƙota to hoƙoleu zane ar hoƙoleu foƙe.

³ Ikan to forishkar buza zae, al-Mosir leƙa sonod oilae tumrau, tumrau amrar menotor fol. I sonod to kunu ƙali-ƙolom dia leƙa oise na, ƙali Allar Pak Ruhu dia leƙa oise. Ikan to Tur fao faoa shoriotor laƙan kunu fattoror ufre leƙa nae, borong manshor dilor mazeu leƙa oise.

⁴ Ou befare al-Mosir usillae Allar dorbaro amrar furafur nichchoeota ase,

⁵ ta-o amra ze nizor gune hoƙolta ƙoriltam farmu, ila kunu ƙota nae. I ƙezmoti gun to ƙali Allar ges takiu fai.

⁶ Allar loge milonor noea usillar ƙota zananir lagi, tainu amrare i ƙezmoti gun dan ƙorsoin. I usilla to okkore okkore shoriot manar befar nae, borong Pak Ruhur porichalonae dilor iman-akidar befar. Ƙaron okkore mout, ar ruhe zindegı.

⁷ Fattoror ufre leƙa shorioti ze ƙezmote moron ae, ou shoriot nazilor shomoe to Allar mohima zair oisil. Ou shomoe Hozrot Musar seharao Allar mohimae nurani oigesil. Tan mukor nurani surot zudio aste aste ƙomi zaoa dorsil, tebou Boni Israil oƙole tan seharar bae saoar takkot oise na.

⁸ Ou shoriotor ƙezmoti fol zudi oto mohima-ala oe, te Pak Ruhur ƙezmoti fol ƙoto beshi mohima-ala!

⁹ Ou ze okkori shoriote manshore dushi shai-bosto kore, tar kezmoti kam zudi oto mohima-ala oe, te ze kezmete be-kosur kalas koia goinno kore, i kezmot to aro koto beshi mohima-ala!

¹⁰ Buzrae ni, age zeta mohima-ala asil, okon itar kunu mohima nai koileu sole, tar tulonae okonkur noea kezmotor mohima bout beshi.

¹¹ Ze nuranir tez koma dorsil, ita zebila oto mohima-ala, te zeta sirokal roibo, ita to aro koto beshi mohima-ala!

¹² Amrar mono olağan asha ase gotikeu amra kula-kuli mati.

¹³ Amra to Hozrot Musar lağan nae, tain forda dia tan muk guria toisla, zate tan mukor komi zaoa nurani surot Boni Israile na dekein.

¹⁴ Oile tarar dil fashan oigesil. Ar okono Tourat Shorifo leka, Allar loge milonor hou furana usillar kota tilaot korle, tarar dilor maze forda take. Kali Isa al-Mosir ufre iman anle ou forda hori zae.

¹⁵ Ar okon forzonto Hozrot Musar Tourat Shorif tilaot korar shomoe Boni Israil okolor dil forda dia gura take.

¹⁶ Tarar maze keu zebila malikor ufre iman ane, ou shomoe hou forda hori zae.

¹⁷ Ou malik oila Pak Ruhu, ar malikor ruh zeno ase, onou shadinota ase.

¹⁸ Aenar samne zela forda sara muk shorashori deka zae, oula amra hokolu al-Mosir nurani mohima deki deki aro beshi mohima-ala bonia tan lağan mohima-ala oiram. Amrar malik Isa, mani Pak Ruhur kudroti boleu ila or.

Maṭir bashono raḳa don

¹ Ou ḳarone, Allae meherbani ḳoria ou noea ḳezmoti ḳamor daeitto amrar ato disoin ḳori, amra nirash oi na.

² Toblik kamo manshe lukaia zeta be-haeami ḳoroin, ita amra muṭeu ḳori na. Amra kunu ḳamo sol-soturi ḳori na, Allar kalamo bezal mishai na. Borong hok kotare kula-mela ḳoia hoḳol manshor gese ar Allar dorbaro amrare zoiggo hishabe forman ḳori.

³ Amrar kush-ḳobri zudi lukail taḳe, te lannoti fote zera zaira, tarar geseu lukail taḳe.

⁴ Ou zogotor devta Iblise o-imandar oḳolor dilre anda banailise, zate tara kush-ḳobrir nur na deḳe. Ou kush-ḳobrir mazdi al-Mosir gourob zair oise, ar ou al-Mosiu oila Allar obikol surot.

⁵ Amra to nizor befare toblig korram na, ḳali Isa al-Mosire toblig korram, tainu malik, tan lagiu amra tumrar gulam bonchi.

⁶ Amra ita toblig korram, ḳaron ze Allae ḳoisoin, “Andair taki for ouk,” hou Alla Pake tan nur amrar dilo zalaisoin, zate al-Mosir seharar maze Allar nuror mohima zair oe.

⁷ Allai ou nuror don to maṭir bashono raḳa oise, ou bashon oilam amrau. Maṭir bashono raḳa oise, zate manshe buzto fare ou kudroti mohashokti amrar nizor ges taki aise na, borong Allar ges takiu aise.

⁸ Hoḳolbae taki amrar ufre bout laḳan saf aileo, amra surmar oisi na. Amra bedisha lagleo furafur nirash oisi na.

⁹ Amrar ufre zulom ḳora oileo Allae to amrar log sarsoin na. Maṭit falaia asarleo amra binash oisi na.

¹⁰ Hamesha malik Isar moutor duk-koshtor nishana amrar shorilo loa guriar, zate amrar shorilor maze tan zindegio deka zae.

¹¹ Ar amra zoto shomoe basia asi, malik Isar lagi amrare to hor-hameshau moutor ato tuli deoa or, zate ou moutor odin shorilo tan zindegi zair oe.

¹² Ou nomunae amrar maze kam korer moute, ar tumrar maze kam korer zindegie.

¹³ Fobitro Zobur Shorifo ase, "Ami iman anchi gotikeu koilam." Ou ekoi imanor bagi oia amra-o ola koi.

¹⁴ Karon amra zani, ze Allae malik Isare zinda korsla, hou Allae tan loge amrareo zinda korba, ar amrar loge kori tumrareo tan samne azir korba.

¹⁵ Ita hoqolta tumrar balair lagiu oise, zate manshor ufre Allar ze rohomot nazil oise, hou rohomotor katire bouta aro beshi kori Allar shukria adae kore ar Allar gourob oe.

Imane zindegi katani

¹⁶ Erlagi amra nirash oi na. Zudio amrar rokto-mangshor shoril koe oizar, tebou amrar ruh din din taza oia uler.

¹⁷ Okon amra ze koedinor lagi shamainno koshto koriar, i koshtor bodla amra siroqalor lagi ofuronto shan-mohima lab kormu.

¹⁸ Soukdi zeta deka zae, amra to itar bae sairam na, borong zeta deka zae na, otar bae sairam. Souke zeta deka zae, ita to tura koedinor, oile zeta deka zae na, ita siroqalor.

5

¹ Amra zani, amra i duniabi ze ðera-goro boshot ðori, mani ze ðomzur shoril loia asi, ikan zudi binasho oizae, tebou Allar deoa ekan gor amrar ase. I gor kunu manshor ator banail nae, ikan to hamesha behesto ase.

² Ou ðera-goro boshot ðora halote amra lamba ðori dom falaiar ar dile-zane asha ðoriar, zate behesti hou noea goror maze amrare gura oe.

³ Ta-o ðota oilo, ou ðera-gor bangar bade amrare zanu lemða deka na zae.

⁴ Ou ðera-goro roia bar-buza boite boite amra ahazari ðoriar. Erbadeo amra rokto-mangshor i ðera-gor sařtam sai na, ta-o bala goror lagi bar sairam, zate okonkur ou moutor odin ðera-gor falaia, sirokal zinda takar zuka gor fai.

⁵ Otar lagiu Allae amrare zuit ðorsoin ar itar baenama hishabe amrare Pak Ruh dan ðorsoin.

⁶ Erdae amrar shaoshor kunu komti nai. Amra to buzilisi, zotodin ou rokto-mangshor shoril loia boshot ðormu, otodin amra malikor ges taki horail roimu.

⁷ Amra to sokur deka kuntar boroshae soli na, kali imanor boleu soli.

⁸ Ashole amrar bitor bora shaosh ase, ar amra rokto-mangshor shorilo roa taki malikor loge boshot ðorakanu bala mono ðori.

⁹ Erlagi amra shorilor maze taki ba na taki, amrar niot oilo malikre kushi ðora.

¹⁰ Karon al-Mosir adaloto amra hoðoleu ubani lagbo, zate duniabi ou shorile amra zoto nomunar bad-bala kam ðorsi, ou kamor bodla fai.

Allar loge milonor kush-ðobri toblig

¹¹ Amra to Alla Pakre çoraia soli, erlagi manshore buzanir sešta qorram. Amrar befar to Allar dorbaro forishkar, asha qori tumrar geseo ola forishkar asi.

¹² Ikan qoia amra hirbar nizor tarif gairam na, borong amrare loia tumrar boçair qaron zanairam. Te zeta manshe bitor na dekia, qali manshor bargala loia boçai qore, tumra tarare eçta zuaf ditae faro.

¹³ Amra zudi fagol oi, te Allar fagol oisi, ar zudi mata bala taçe, te tumrar lagiu bala ase.

¹⁴ Al-Mosir mohobbote amrare fush manaiia salae. Amra nichchit buzchi, hoçolor torof taki eçzonor mout oisil, erlagi hoçoloru mout oise.

¹⁵ Tain hoçolor lagi mara gesla, zate zera zinda asoin, tara zanu ar nizor lagi na basoin. Borong tarar lagi zein mara gesla ar hirbar zinda oisla, tan lagiu tara basoin.

¹⁶ Erlagi oçon taki amra ar manshor bairor surot dekia bisar qori na. Amra to age al-Mosire olakan mono qorslam, oile oçon ar ila qori na.

¹⁷ Çeu zudi al-Mosir torika qobul qore, te he noea foeda oilo. Tar furan hoçolta fusia hari ekkere noea bonigelo.

¹⁸ Ita to Alla takiu oe. Tain al-Mosir usillae tan loge amrar milon goçaisoin, ar amrare ou qezmotor daeitto disoin, bad-baki hoçol manshore tan loge milai ditam.

¹⁹ Er mani oilo, Allae manshor gunar bae na saia, al-Mosir usillae tan loge manshor milon goçaisoin. Ar ou milonor kush-qobri tobligor daeitto amrare disoin.

²⁰ Erlagiu amra al-Mosir naib hishabe tan fokke matiram. Ashole Allaeu amrar mazdi

manshore minoti qorra. Ar al-Mosir fokke amra-o minot qorram, tumra Allar loge milito o.

²¹ Hozrot Isa al-Mosie to kunu guna-naformani qorsoin na. Oile amra hoqolor gunar shaza Allae tan kando tuli dila, zate tan ufre iman anar mazdi Allai fobitrotae amra forezgar hishabe qobul oi.

6

¹ Allar qadim hishabe amra ou minot qoriar, tumra zebra Allar rohomot faiso, te iqtare bifol oite dio na.

² Pak kalamo Allae bataisoin,

Ami shotik shomoye tumar arzi hunchi,
nazat faoar din tumare shaijjo qorsi.

Huno, oqonu shotik shomoe, oqonu nazat faoar din.

Hozrot Paulusor qezmot qamor halot

³ Al-Mosir name amra ze toblig kori, ou tobligor bodnam na oar lagi amra ila kunu qam qori na, ze qame manshor mono bada ae.

⁴ Borong hoqol befare amra forman deqairam, amra Allar qezmotqari. Bout duk-koshto, zulom-mosibot, ar bifod-afod shaijjo qoria itar forman diram.

⁵ Amrare bout bar mair-doir qora oise, bout bar zelo harani oise, bout danga-hangama amrar ufredi gese, bout menot qorsi, na gumaia rait qataisi ar ufash-qafash roisi.

⁶ Ita saṛa amrar pak-forezgar zindegı, aḳol-buddi, soborgari, doya-maea, dilor Pak Ruhı, ḳaṭı mohobbot,

⁷ hok kota ḳoa ar Allar kudroti bol, duio ate forezgarir atiar bebohar ḳoriar.

⁸ Manshe amrare dam deuk ba na deuk, amrar shunam gauk ba bodnam gauk, itae amrar zae ae na. Manshe ḳoira, amra bule ṭog, ashole to amra hok fote soli.

⁹ Manshe ḳoin, amrare sinoin na, tebou hoḳole amrare sine. Amra morar laḳ oigeleo basia asi. Amrare mair-doir ḳora or, oile zane mara or na.

¹⁰ Bout dukor mazeo amra hamesha kushibashi asi. Amra nize gorib oiao boutre doni banaisi. Amrar to kuntau nai, tebou hokkoltar malik. Ou laḳan amra forman ḳorsi, amra Allar ḳezmotḳari.

¹¹ O Korint zomator mumin bai oḳol, tumrar gese to kula-melau matisi, tumrar lagi amrar mon uzaṛ ḳori disi.

¹² Amrar dil tumrar lagi kulia raḳsi, oile tumrar dil amrar lagi bond ḳori toiso.

¹³ Te amar aolad hishabe tumrare ḳoiram, amra zela tumrar lagi dil kulia raḳsi, tumrao ola amrar lagi tumrar dilḳan kulia deo.

Bidormir loge kuṭumita ḳorio na

¹⁴ Tumra bidormi manshor loge ḳeshikuṭumita ḳorio na. Forezgaror loge naformanor mil kuai? Allar nuror loge andarir kunu ḳatir ase ni?

¹⁵ Iblisor loge al-Mosir kunu ḳatir ase ni? Muminor loge bidormi shorik oibo kila?

¹⁶ Zano to, pak kalamo Allae ḳoira,

Ami tarar bitre boshot qormu,
 tarar logeu sola-fira qormu.
 Ami oimu tarar Alla,
 tara oiba amar proza.

Te amrau oilam zinda Allar boshot kana. Allar
 kaba goror bitre murtir kunu zaga ase ni?
¹⁷ Pak kalamo aro bataisoin,

Erlagi tumra bidormir ges taki horo,
 tarar ges taki alog ro,
 nafak kunu zinish soio na,
 teu ami tumrare qobul qormu.
¹⁸ Ami oimu tumrar gaibi baf,
 tumra oibae amar aolad,
 ikan ami Alla Rabbul Alamine qoiram.

7

¹ O maear bai oqol, ou oada oqol to amrar lagi
 qora oise, te ao amra shorilor ar dilor nafaki
 dur qoria nizore pak-saf qori, ar Allar qor-qofe
 furafur fak-fobitro zindegir fote soli.

Touba qarar bade kushi-bashi

² Bai oqol, amra to kunu manshor loge oinnae
 qorsi na, qeuror qetio qorsi na ar qeurore
 toqaisio na. Erlagi amrare tumrar dilor maze
 tai deo.

³ Tumrare dushibar lagi ikan qoiram na. Ami
 ageu qoisi, tumra to amrar zanor zan qoiljar
 tukra, amra morleo ekloge mormu, basleo
 ekloge basmu.

⁴ Tumrar ufre ami kub borosha qori, tumrare loia borai qori. Erlagi oto duk-mosibotor maze roiao amar zano shanti asil, amar mon kushibashie bora.

⁵ Huno, ou Makidoniat aiao amrar shorilo kunu shuk faisli na, hoqolbae takiu amra qoshto faisli, baire asil gondogul ar zanor bitre asil dorqof.

⁶ Oile Alla Pak, zein duki zonre buz dein, tain amrare buz dibar lagi Titas baire ono anaila.

⁷ Kali ikan nae, Titas baie tumrar ges taki ze buz faisla, ou buze tain amrareo buz dila. Tain tumrar monor eshki, tumrar qanda-qatir qota zanaila, amar befare tumra bule kub agrohi. Ou hoqolta hunia ami kub kushi oisi.

⁸ Baiainre, amar agor sitir maze zudio tumrare duk dislam, tebou amar mono kunu qoshto nai. Ami zebra buzlam, ou sitie tumrar monor maze tura qoedin duk dise, ou shomoe amio kisu duk faislam,

⁹ oile okon ami kushi. Tumrare duk deoae kushi oisi na, borong duk faia tumra toubaqorso dekia kushi oisi. Ou duk faislae tumra Allar morzie, zate amrar dara tumrar kunu qeti na oe.

¹⁰ Allar deoa monor qoshto manshe toubaqoroin, ar zan basain. Te ou qoshto to duk nai. Oile duniabi monor qoshto manshor moron ane.

¹¹ Tumra buzrae ni, Allar deoa monor qoshto tumrar qoto balai qorse, tumrare naformani taki basaise, gunar bae tumrar ginna zonmaise, mone mone qoto dor doraiso, Allar bae qoto aguaiso, naformani qamor bisar qorso. Ou befare tumra hoqol monte formandiso, tumra

nikut.

¹² Ami zudio ou siti leksilam, oile ze manshe oinnae qorse ba zar ufre oinnae qora oise tar lagi nae, borong Allar dorbaro zate tumrar ou halotkan zair oe zen, tumra hasau amrare mohobbot qoro, otar lagiu lekxi.

¹³ Erlagi amra buzo faisai.

Ou buz faia ar bai Titasor kushi dekia amra aro beshi kushi oisi, qaron tumra hoqolor ges taki tain kub aram faisoin.

¹⁴ Ashole ami tumrare loia tan gese boqai qorslam, ete kunu shormindao oisi na. Tumrar gese amrar batail hoqol qota zela hasa asil, oula tumrare loia amrar boqai qoraqano tan gese hasa forman oise.

¹⁵ Tumra hoqole zela tan nosiot mancho, monor dor-qofe kafi kafi tanre qobul qorso, oqan mono oae tumrar bae tan maea kub beshi barise.

¹⁶ Ar amio kub kushi, tumrar ufre ami oqon furafur borosha qortam fari.

Ehudiar Isaei imandar oqolor lagi dan (8:1-9:15)

8

Makidonia deshor zomat oqolor dan-qoerat

¹ Bai oqol, ami tumrare zanairam Makidonia deshor zomat oqole Allar ges taki qoto niamot faisoin.

² Zudio bout duk-mosibot dia tarare forikka qora oisil, tara kub gorib halote asla, tebou tarar monor maze bout furti asil, tara kula ate Allar name dan-qoerat qorsoin.

³ Ami tarar fokke ƙoiram, tara kushi oia nizor tofik mafik, emonki tofik taki aro beshio dan ƙorsoin.

⁴ Ar kub kiali oia amrare minot ƙorsila, zate Allar ze bonda oƙol obabor maze asoin, erare obab taki basanir lagi tara shorik oita faroin.

⁵ Amra zotoƙan asha ƙorslam, tara er saiteo beshi dan ƙorsoin. Kali ikan nae, tara foela nizore malik Isar ato shofisoin, bade Allar morzie amrar geseo shofa oisoin.

⁶ Ita dekia amra Titas baire kub minot ƙorslam, dan-ƙoerat ƙorar ze ƙam tain tumrar maze salu ƙorsoin, ita zanu shesho ƙoroin.

⁷ Tumra zela hoƙol befareu aguail aso, tumrar shobol iman, ƙota-barta, aƙol-hekmot, monor eshki, ar amrar bae zela kub maea-mohobbot ase, ƙik ou laƙan dan-ƙoerat ƙorar nek amolo zanu tumrar maze baia foƙe.

⁸ Ita lekia ami tumrare kunu hukum diram na, ƙali forikka ƙori deƙram, Erlagi oinno mumin oƙolor nek kamor eshkir ƙota zanairam. Deki, tumrar mohobbot ƙotoƙan nikut.

⁹ Amrar malik Isa al-Mosir rohom-niamotor ƙota to tumra zano-u, tain to Allai done doni asla, oile tumrar lagi gorib bonla, zate tain gorib bonar ƙarone tumra doni oitae faro.

¹⁰ Te ami tumrare foramish diram, ita manle tumrar balai oibo, tumra kub kushi oia goto bosor dan-ƙoerat tulat lagsilae,

¹¹ oƙon ou ƙam shesh ƙoro. Monor ze eshki loia tumra i ƙam shuru ƙorsilae, oula eshkie zarzir tofik mafik dan-ƙoerat dia ita shesh ƙoro.

¹² Dan-ƙoerat dibar niot ƙorle, Allae to niot mafik kobul ƙoroin, te tofik taƙle deo, na taƙle

nai.

¹³ Baiainre, ami sairam na, oinno manshe aram qorouk ar tumra qoshqo qoro, borong tumra hoqolor halot eq laqan ouk, oqanu asha qorram.

¹⁴ Tumrar zeta don-doulot oqon barti ase, otae tarar obab miqauk, ar tarar zebila beshi oibo, ou shomoe tarao tumrar obab miqaiiba. Olaqan hoqolor halot eqoi laqan ouk.

¹⁵ Zela Tourat Shorifo ase, "Zein beshi tukaisla tano beshi oise na, ar zein tura tukaisla tano qom oise na."

Dan-qoerat batibar qalo hushiari

¹⁶ Huno, ami Allar shukria adae qori, amar monor maze tumrar bae zela kial ase, Allae ou eqoi laqan kial dan qorsoin bai Titasor mazeo.

¹⁷ Tain amrar onurud mania tumrar gese zaira, ar ashol qota oilo tain nizeu kushi oia zaira.

¹⁸ Tan loge qori amra hou baireo faqaiar, kush-qobri tobligor lagi hoqol zomateu i bair tarif qoroin.

¹⁹ Zomator manshe qali tan tarif qorse na, amrar loge oia dan-qoerat loia zaibar lagi tarau tanre fosond qorse. Te malik Isar gourobol lagi, ar oinno mumin oqolre shaijjo qorar lagi, amra ou dan-qoerat nibar bebosta qorsi.

²⁰ Amra kub hushiar oia soliar, zate boqo aqaror ou rilif bilanir bade qeu amrar bodnam qorar shuzug na fae.

²¹ Mono rakio, amra qali malik Isar gese nae, manshor samneo hok-halali roar sesta qoriar.

²² Ar erar loge qori amra aroq baire faqairam, enre amra bout bar bout laqan forikka qoria

deksi, tan kub eshki ase. Oḡon deḡram, tain tumrare kub bishash ḡoroin, erlagi tumrar bae tan eshki aro baḡise.

²³ Oḡon Titas bair befare ami ḡoiram, ein to amar loge roin, ar tumrar lagi ḡam ḡoroin. Bad-baki hoḡol baiaintor befare ḡoiram, hoḡol zomator manshe fosond ḡoria tarare faḡaira, tarar mazdi al-Mosir gourob oe.

²⁴ Erlagi ḡoiram, tumrar bitoror mohobbot, ar tumrare loia amra ze boḡai-beḡagiri deḡai, itar forman deḡaio. Teu hoḡol zomator manshe buzba, tumra ḡe.

9

Dan-ḡoerator befare nosiot

¹ Baiainre, Allar pak bonda oḡolre shaijor lagi dan-ḡoerat tular ze ḡam soler, ita befare to tumrare kunta leḡar zorur nae.

² Ou befare tumrar monor kial to amar zana ase. Makidoniar manshor gese ami tumrar shunam gaia ḡoiram, Gris deshor manush mani tumra, goto bosor takiu dan-ḡoerat loia zuit aso. Tumrar i eshki deḡia, Makidoniar bout manush hozag oisoin.

³ Erlagi ami ou baiainre faḡairam, zate tumrare loia amra ze boḡai deḡai, tara gia nizor souke ita deḡia forman fain. Te ami zela boḡai ḡorsi tumrao olaḡan zuit roio.

⁴ Arnae amar loge oia Makidoniar kunu baiain gia zudi deḡoin tumra zuit nae, te tumrar ufre oto boḡo borosha ḡorae, amra shorom faimu ar tumrao shorminda oibae.

⁵ Erlagi ou mumin oḳolre onurud ḳorlam, tara zanu amar age tumrar gese zain. Rilif ḳamor lagi dan-ḳoerat dibar ze oada ḳorsilae, tara gia oguin zuit ḳorat shaijjo ḳorba. Te tumrar ges taki zur-zobordosti ḳoria kunta adae ḳora oito nae, ḳali monor kushie deoa dan-ḳoerat neoa oibo.

⁶ Kial rakio, ze giroste tuṛa ḳori zala bain dey, he tuṛa foshol daibo, ar ze giroste besh ḳori zala bain dey, he besh ḳori foshol daibo.

⁷ Te tumrao ola forteḳe zarzir niot mafik dan-ḳoerat deo. Monor maze ḳoṣṣṭo loia ba deoa lagbo ḳori dio na. Ḳaron dilor kushie dan ḳorle, Allae maea ḳoroin.

⁸ Allae tumrare hoḳol laḳan rohom-borkot dita faroin. I ḳemota tan ase, zate tumrar dorkari hoḳolta hamesha tumrar gese taḳe, ar nek kamor lagi kula ate ita bilaitae faro.

⁹ Zela Fobitro Zobur Shorifo ase,

He to kula ate bilai dise,
gorib oḳolre dan ḳorse,
tar forezgari siroḳal staei.

¹⁰ Mono rakio, girostor lagi zein bis zugaia dein, ar ḳaibar lagi zein dana-fani zugaia dein, tain tumrareo bis zugai diba, itat borkot diba, tumrar nek kamor foshol bout baṛai diba.

¹¹ Ou laḳan tumra hoḳolmonte doni oibae, ar kula ate dan-ḳoerat bilaibae, teu amrar mazdi Allar shukur-guzar adae oibo.

¹² Ou rilif ḳame ḳali Allar bonda oḳolor obabo shaijjo oito nae, borong bout zonor torof taki Allar shukur-guzaro baia foṛer.

¹³ Tumra al-Mosir kush-koḅrir ufozuko ou ḳezmot ḳorso dekia, tara Allar shukur-guzar adae ḳorba. Tumra duio ate dan-ḳoerat bilanie, Makidoniar manshe ar baki hoḳoleu Allar gourob ḳorba.

¹⁴ Tumra dan-ḳoerat deoae Allar ges taki ou ze asanok niamot faisio, ota dekia tara tumrar lagi dile-zane dua ḳorba.

¹⁵ Allar ze danor ḳota mukdi ḳoia fuḳanir shaiddo nai, hou danor lagi tan tarif ouk.

Sahabi hishabe Hozrot Paulusor odikar (10:1-13:14)

10

Allar ḳezmoto Hozrot Paulus

¹ O mumin baiain, al-Mosir norom ar doyalu babor ḳota iad ḳoria, ami Pauluse tumrare minot ḳoriar, manshe ḳoin, ami zebila tumrar loge roi, ou shomoe ami bule ḳorai ḳorai taki, ar horia gia harle shaoshi oizai.

² Te zera mono ḳore, amra duniabi manshor laḳan zindegi ḳataiar, tarar loge zotoḳan shaosh deḳani dorḳar, ami sairam, ami aoar bade zanu otoḳan shaosh deḳani na lage.

³ Amra zudio roḳto-mangshor manush, oile amra ze laḳai ḳorram, ita to kunu roḳto-mangshor laḳai nae.

⁴ Duniabi sifaie zeta ostro-shostro dia laḳai ḳoroin, amra to ita dia laḳai ḳori na, Allai bole amrar ostro-shostroe faḳor uforor bangkaro bangilto fare.

⁵ Amrar ostrodi manshor banoaḱ zukti binash ḳori, ar Allare sinar fote zoto laḳan bada-bigno

dilre aṭkaia raḡe, itareo binash ḡori. Manshor monor hoḡol ku-sintare ḡedaia hari al-Mosir tole ani.

⁶ Te tumra zebła shullo-ana baiddo oia tan tole aibae, hou shomoe zeta obaiddo roiba, itare shaza dibar lagi amra zuit oimu.

⁷ Tumra to ḡali amrar bairor surot deḡso. Kunu manshe zudi nizore al-Mosir ummot mono ḡore, te tar sinta ḡora zorur, he zan ummot, amra-o to tan ummot.

⁸ Ashole malik Isae amrare ze odikar disoin, i befare ami kisu boḡai deḡaileo to shorminda oitam nae. Ḳaron i odikaror uddesho oilo, tumrare ḡoria tula, kunu ḡeti ḡora nae.

⁹ Amar i leḡa foḡia mono ḡorio na, ami siṭi dia tumrare dor deḡairam.

¹⁰ Kunu kunu manshe matoın, “Tan leḡa siṭinte dilo deḡka mare, ita shoktishali siṭi, oile tain ḡandat aile deḡa zae, tain ḡomzur ar oaz-nosio to muṭeu ḡorom nae.”

¹¹ Ota manshore zananir lagi ḡoiram, amra duroi taki siṭir mazdi zeta leḡram, samne aile ṭik olau ḡormu.

¹² Tumrar mazor kunu kunu zone tar nizor tarif gae. Tarar loge to amrar tulona sole na, ba tarar dolor shodoishsho oiteo shaosh ḡori na. Tara to nize nize zeta bala mono ḡoroin, otar logeu tarar tulona ḡoroin, otadiu bisar ḡoroin, buzrae ni, ita ḡoto boḡo ammok!

¹³ Huno, amrar zotoḡan boḡai ḡora usit, er beshi ḡortam nae, borong Allae amrar ḡamor ze shimana ṭik kori disoin, amra er bitre roiau boḡai ḡormu, i shimanar bitre tumrao aso.

¹⁴ Erlagi amra zebła tumrar gese geslam, ou shomoe shimar bara to gesi na. Tumrar gese

to hoḳol foela amrau al-Mosir kush-ḳobri toblig korat geslam.

¹⁵ Eşaṛa foror ḳam loia amra gourob ḳoriar na, ita ḳorle shimar bara oilo one. Amra asha ḳoriar, tumrar imani bol baṛar loge loge tumrar maze aro bout ḳam ḳortam farmu.

¹⁶ Hou shomoe tumrar ges taki aro duror deshainto gia kush-ḳobri toblig kortam farmu. Teu kunu manshe ḳoito farto nae, foror ḳam loia amra boṛai ḳoriar.

¹⁷ Oile Allar kalamo ase, “Ze manshe boṛai ḳore, he Malik-Moulare loia boṛai ḳorouk.”

¹⁸ Ḳaron nizor shunam nize gaileu forman oe na he bala manush, borong Malik-Moulare zar shunam gain, he-u bala hishabe forman oe.

11

Bondo sahabi taki hushiar

¹ O mumin bai oḳol, ami sairam, amar tuṛa be-aḳoli tumra shoiḳjo ḳoro, ar hasau tumra amare shoiḳjo ḳorraeo.

² Allai eshkir zalae amar dilo tumrar lagi eḳ zala foeda oise. Te ami eḳzon noshar loge tumrar biar mat-ḳota ṭik kori raḳsi, en nam al-Mosi. Ami sairam, shoti ḳoina hishabe tumrare tan ato shomzai ditam.

³ Oile ami ḳoraia, hou hafe zela ku-buddi dia Bibi Haoare be-fote nisilgi, olaḳan tumrareo al-Mosir ges taki horailito fare, he tumrar dilor ḳaṭi bab ar monor nishana alailibo.

⁴ Ḳaron amra ze Isar befare toblig korsi, oinno zone zebla tanre saṛa dusra kunu Isar ḳota toblig kore, tumra ita manrae. Ar tumra ze Pak Ruh

faiso, ou Pak Ruh sara dusra kunu ruh faile, ba ze kush-қobri tumra manrae, i kush-қobri sara dusra kunu kush-қobri hunle, kub kushi oiau manilirae.

⁵ Oile ami mono қori na, hou nam-қaki sahabi dol taki ami kunumonteu huru.

⁶ Ami zudio kub mița mița shure oaz қortam fari na, tebou amar to aқol-buddir қomti nae, ita to ami hoқol nomunae hoқol halote tumrare deқaisi.

⁷ Tumrar unnoti deқanir lagi ami bina betone Allar deoa kush-қobri toblig koria nizore nisa қorsi, ita kunu faf қorsi ni?

⁸ Tumrar kezmotor lagi ami oinno zomat oқolor ges taki shaijjo anchi, қoite gele tarare luția anchi.

⁹ Tumrar gese roar қalo ami zebra obabo fořlam, hou shomoeo ami queuror buza oisi na. Қaron Makidonia taki zeta baiain aisla, tara amare shaijjo қorsoin. Te kunu haloteu ami tumrar buza oisi na, oitamo nae.

¹⁰ Al-Mosir ze hokikoti amar bitre ase ou hokor boleu ami қoiram, asta Gris deshor kunu zagatu amar i beғagiri queu bond қorto farto nae.

¹¹ Ami ila matar қaron kita? Ami tumrare maea қori na ni? Eқ Allaeu zanoin, ami tumrare қoto maea қori.

¹² Nizor boғai-beғagiri deқaia zeguин amrar homani oita sain, itae zanu i shuzug na fain, otar lagi ami zeқan қorat asi, ikan қorat roimu-u.

¹³ Ashole to ita oila bonдо sahabi ar тоғ kamlain. Tara nizore al-Mosir sahabi deқaito қori nizor surot bodlilae.

¹⁴ Ete taijjub oar kunta nae, Ibliseo to nizore nuror firista deķanir lagi tar surot bodlae.

¹⁵ Erlagi zeguinte Iblisor ķezmot ķoroin, tarao zudi nizor surot bodlaia deķain tara nek kam ķorra, te taijjub oar kita ase? Tarar ķamor fol tara aķerato faibo.

Sahabi ķamor lagi Hozrot Paulusor zulum-ķoshō

¹⁶ Ami aroķbar ķoiram, amare zanu ķeu fagol mono na ķore. Ar zudi ila mono ķorilao, te amare eķ fagol hishabeu shomzilao, zate amio tura boŗai ķorar shuzug fai.

¹⁷ Ami oķon zeta ķoiram, ita malik Isar hukume ķoiram na, ķali nizor boŗai deķanit gia faglami ķorram.

¹⁸ Bout zone zebła duniabi bishoe loia boŗai deķaira, te ami ķene deķaitam na?

¹⁹ Tumra to beshi aķoldar, erlagi be-aķol oķolre kush dile shoiĵjo ķoro.

²⁰ Ķali ikan nae, ķeu zudi tumrare nizor gulam banaia raķe, tumrare tar shikar banailae, fando falae, tumrar ufre ustadi ķore ba tumrar galo soŗ mare, ta-o to tumra kushi oia shoiĵjo ķorrae.

²¹ Oile ami kub shorminda oia shikar ķoriar, ita befare tumrar gese amra boŗo ķomzur aslam, ila netagiri ķortam farsi na.

Oinno manshe zeta loia boŗai ķorar shaosh fae, amaro shaosh ase ita befare boŗai deķanir, ami ķali fagolor laķan ita matiram.

²² Zetae boŗai-beŗagiri deķain, tara kita Ibrani zatir ni? Amio to tarar laķan. Tara Boni Israil zatir ni? Amio ola. Tara Hozrot Ibrahimor aolad ni? Amio to.

23 Tara al-Mosir kezmotkari ni? Ami aro boꝛo kezmotkari. Mono rakio, ami fagolor laꝛan matiram. Ami al-Mosir kezmoto lagia tara taki bout beshi menot korsi. Bout bar zel kaꝛsi, bout bar mair-doir kaꝛsi, ar bout bar moutor mukabila oisi.

24 Ihudi oꝛole amare fasbar durra marsoin, fortek bar unusallishṭa kori durra kaꝛsi.

25 Tinbar amare singladi mara oise. Ekbar amare kankor mara oise. Tinbar amar zaz dibi gesil, ar ek din ek rait doriar fanit bashail aslam.

26 Ami bout desh sofor korsi. Ban-fanir ato, sur-daꝛaitor ato, nizor zatir ato ar bin zatir ato ami mosiboto forsi. Esaꝛa ṭauno, morubumit, doriat, ar bonḍo mumín oꝛolor ato-o ami mosiboto forsi.

27 Ou duk-mosibotor mazeo zane-forane menot korsi, bout rait uzagori korsi, kani-fanir lagi koṣṭo faisi, bout ufash-kaꝛash roisi, shit ar kafor-suforor obabeo koṣṭo faisi.

28 Ita saꝛao al-Mosir zomat oꝛolor lagi ami fortek din sinta kori.

29 Keu komzur oile ami nizeo tar komzurir bagi oi na ni? Kunu ku-shongir talo foria keu gunar fote gelegi, ami oshanti kori na ni?

30 Ami zudi boꝛai dekaꝛitam sai, te ou komzuri loiau boꝛai kormu.

31 Amrar Alla Pak ar malik Isa al-Mosir gaibi baf, zein hamesha gourob faoar laꝛ, tain nizeu zanoin, ami kuntu misa matram na.

32 Dameskor bashsha Aritar hakim sabe amare dorar lagi Damesk ṭauno fara deoar hukum disla.

33 Oile ṭaunor baundorir oalor maze ze kirki asil, mumín baiainte ek tukrit kori ou kirki baedi

amare maṭit lamai disla, ou nomunae ami tan at taki bagisi.

12

Hozrot Paulusor ḡas doroshon

¹ Te amar aro kisu boṛai ḡora dorḡar, i boṛaie kunu faeda nai, oile malik Isae ze doroshon deḡaisoin ar zeta zanaisoin, ita oḡon ḡoiram.

² Hozrot Isar eḡzon ḡadimre ami sini, oḡon taki souddo bosor age meraz shorifor lagi tanre behesto tulia neoa oisil. Tain zannatul-ferdouso gela, i shomoe tain sho-shorile gesoin ki na zani na, ḡali Allaeu zanoin.

³ Te enre ami sini, oile tane sho-shorile neoa oise ki na ami zani na, ḡali Alla Pake zanoin.

⁴ Meraz shorifo nia harle tan loge bout batchit ḡora oise, ita batchit manshore hunani ṭik nae.

⁵ Oula manshore loia ami boṛai ḡormu. Amar nizore loia kunu boṛai nae, ḡali amar ḡomzurir lagi boṛai ḡormu.

⁶ Ou boṛai deḡaite saileo, ami kunu be-aḡoli ḡortam nae, ḡali hasa mat matimu. Ta-o ami boṛai deḡani bad dilailam, kizanu amar ḡam-ḡaz deḡia ba amar mukor zobanbondi hunia, manshe oḡon amare zotoḡan mono ḡoroin, er saite beshi mono ḡorilain.

⁷ Allae amare oto batuni befar zananie amar dilo zanu ohonkar na ae, ou niote tain amar shorilo eḡṭa rifu dila, amare ḡosṭo dibar lagi, ou rifu oilo Iblisor sela.

⁸ Malik Isar dorbaro ami tinbar aroz ḡorslam, ou rifugu amar ges taki horaia nitagi.

⁹ Oile tain zuaf dila, “Amar rohomotu tumar boutta, amar bol-shokti mile ḡali ḡomzur

halote.” Erlagi amar komzurir befare ami kushi moneu borai kormu, zate al-Mosir ou bol-shokti amar maze boshot kore.

¹⁰ Te al-Mosir namor lagi nanan lakan komzuri, bejjoti, obab-onoton, zulum-mosibot, ar be-fanat forleo ami kushi oi. Karon komzur haloteu ami boloban oi.

Korint zomator lagi sinta-babna

¹¹ Ami fagol oisi tiku, oile tumrau amare fagol oite baiddo korso. Tumrar usit asil amar tarif kora. Ami zudio kub shadaron manush, tebou tumrar hou nam-daki sahabi dol taki kunumonteu huru nae.

¹² Ami nizore ekzon hok sahabi hishabe forman korsi, bout shoiijo koriam tumrar maze nanan nomunar keramoti kam, kudroti nishana ar muzeza dekaisi.

¹³ Aichcha ko sain, oinno zomat okol taki tumra kunumonte huru ni? Oe, kali ekta befare huru aso, ita oilo, ami tumrar gese buza oisi na. I bulor lagi amare mafi deo.

¹⁴ Huno, ami tumrar gese zaoar lagi ou tin nombor bar zuit oilam, te ami kunu buza oitam nae, tumrar gese kunu don-samana sairam na, kali tumrare sairam. Ma-bafor lagi don-samana zomani to aolador forz nae, borong ma-bafor usit oilo aolador lagi don zomani.

¹⁵ Te ami kub kushi oiau tumrar lagi amar hoqolta koros kormu, amar nizoreo bilai dimu. Ami zebra tumrare besh kori maea-mohobbot koriar, te tumra kene amare kom maea korrae?

¹⁶ Zai ouk, ami tumrar ufre buza oisi na, arnae keu qoilito fare, ami salaki qoria tumrare duka disi.

¹⁷ Ar tumrar gese ami zerare faqaislam, eraredi tumrare toqaisi ni?

¹⁸ Titas baire ami minot qorlam tumrar gese zaoar lagi, tan loge hou baireo faqailam. Te ou Titase tumrare toqisoin ni? Ami ar Titas, amra duiozone to eqoi ruhe ar eqoi niote kam qori.

¹⁹ Aichcha, tumra mono qorrae ni, ou siti lekia amra nazor dush qatairam? Na, ikan tik nae, O dust oqol, amra al-Mosir qadim hishabe Alla Pakre azir-nazir rakia leqram, tumrare goqia tular nioteu ita qoiram.

²⁰ Ashole amar kub dor qorer, ami zebila tumrar gese aimu, aia hari tumrare zela deqtam sairam, tumra zudi ilakan zuit na o, ar tumrao amar ze ruf deqtae sao na, ami zudi hou ruf deqani lage. Ba aia deki tumrar maze qaijja-fosad, ingsha-ninda, rag-gusa, doladoli, foror bodnam gaoa, gibot gaoa, borai-betagiri ar gul-mal ase.

²¹ Amar bitre dor qorer, ami aroqbar zebila tumrar gese aimu, ou shomoe amar Allae ni tumrar samne amare shorminda banailain, zeta manshe guna qorsoin, zetae nafaki kam, zina, ar bodmaishi qoria toubaqorse na, otare dekia ni ami monor maze qoshto fai.

13

Korint zomatre aqeri hushiari

¹ Baiainre, ami ou tin nombor bar tumrar gese airam. Zano to, Allar kalamo ase, "Dui ba tin

zon manshe eķoi laķan shakki dile ou befar hasa forman oe.”

² Te ami zebła dusrabar tumrar gese geslam, hou soforor age zera guna-ķosuri ķorsil, ami tarare ar bad-baki hoķolre hushiar ķori dislam. Ar oķon ami nize azir na oileo tarare ola hushiar ķori diram, ami aroķbar aile tara ķeu rehai feita nae.

³ Tumra bule forman sairae, amar muk dia al-Mosie matira ni. Ashole al-Mosi to tumrar befare kunumonteu ķomzur nae, tan nizor bol-shokti tumrar maze azir ase.

⁴ Zudio tanre ķomzur halote solibor ufre loķkaia zane mara oisil, ta-o Allar kudroti bole taiń oķon zinda asoin. Ar amra-o ola tan laķan ķomzur asi, oile tan loge zinda roae Allai kudroti bole tumrar gese aia mukabila oimu.

⁵ Tumra nizore zasai ķori deķo, al-Mosir ufre hasaror iman ase ni? Tumra buzo na ni, Isa al-Mosi tumrar dilo asoin. Kial rakio, zasai ķorat ģia zanu tumrar maze bezal na mile.

⁶ Ar ami asha ķori tumra buzbae, amra to ķaķi hishabe forman oigesı.

⁷ Amra Allar dorbaro munazat ķorram, tumra hoķol laķan bod ķam taki basia ro. Amra nizor forezgarir forman deķanir lagi ikan ķoiram na. Ar manshe amrare forezgar mono na ķorleo, tumra hamesha nek kam ķorat ro.

⁸ Amrar ķemota oilo hokor fokke, na-hokor fokke amrar kunu bol nai.

⁹ Te amra zebła ķomzur ar tumra boloban, ita deķle amra kushi. Amra dua ķoriar, tumra touba ķoria hari furafur ķaķi o.

¹⁰ Erlagi ami tumrar ges taki duroi roia ita leķram, zate tumrar samne aia harle malik Isar

deoa ķemota ķaķaia ķoķu bebohar ķora na lage. Malike amare i ķemota disoin tumrare goķia tular lagi, ķeti ķorar lagi nae.

Bidaei salam ar dua

¹¹ O bai oķol, hesh-mesh ķoiram, tumra kushibashi ķoro, nizore kamil banao, eķe-oinnore nosiot ķoro, eķoi monobabe ro, shantie boshot ķoro. Teu shantir ar mohobbotor Allao tumrar loge loge roiba.

¹² Tumra eķe-oinne fobitro golagoli ķorio.

¹³ Allar hoķol pak bondae tumrare salam zanaira.

¹⁴ Malik Isa al-Mosir rohomot, Alla Pakor mohobbot, ar Pak Ruhur ķatir-zoton tumra hoķolor dilo rouk. Amin.

Sylheti New Testament (Latin)
Sylheti: Sylheti New Testament (Latin) New
Testament+

copyright © 2014 Ahle Kitab Society

Language: (Sylheti)

Contributor: The Seed Company

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

2eb27397-6d35-5c13-b811-aecd7920507c